

» L'oro sera i occhi al ministero, el magistrato ingannà ghe le mette  
 » a un soldo l'una e pregiudica el popolo. Questo nasce in un ge-  
 » nere tanto dal popolo stesso usà; l'istesso anca succede nei me-  
 » nuzzami.

» Non ostante i continui stimoli e eccitamenti la carità dell' ec-  
 » cellentissimo Senato ha sempre conservà a un prezzo equal i me-  
 » nuzzami, a tal che fin da tempo immemorabile el luganegher li  
 » paga a 14 lire l'un; de ste 14 lire el ghe ne cava 78. La carne  
 » de testa, ch' el ga debito de vender a do soldi la lira, crua, el la  
 » vende a 26 soldi la lira, cotta. El ga da vender le trippe a sie sol-  
 » di, ma chi trovarà trippe crue dal luganegher? Un poco de acqua,  
 » un poco de persemolo, del rancido lardo, niente de sal, perchè  
 » no i ghe pol usar, ecco la vivanda deliziosa del vostro popolo, e  
 » questa i la paga a 14 soldi la lira. Niente de crudo, perchè el  
 » crudo ga tariffa; tutto cotto, perchè in questo no la ghe ze, e a  
 » ella succede l' arbitrio. La cervella, che i deve vender do soldi  
 » all'onza, no i la pesa, ma, se per altro la ze de cinque onze in  
 » logo de 10, se vol 18 soldi. Tal ze l' arbitrio nell' oglio, nel bot-  
 » tiro. I botteghieri i fa, no quel, che comanda le leggi, ma' quel  
 » che i vol. Ze nebbia? i vovi val tre bezzi l'un; ze piova? i vovi  
 » val do soldi.

» Passemo a quello, che serve per coprirne, parlemo dei drappi  
 » de panno e de seda. La necessità me costringe a vestir. Domando  
 » d'un panno, el mercante se forma tiran, el vol 30 lire al braccio;  
 » no ghè rason, no ghè tariffa; el le vol, bisogna darghele. I vostri  
 » maggiori, che ha voludo consegnarve la repubblica in uno stato  
 » felice non così i faceva. Sortido el panno dalle man del lavorador  
 » el se assoggettava ai riflessi dei proveditori di comun, e questi  
 » ghe faceva la tariffa. In sta maniera no poteva entrar l'estere  
 » maniffature, perchè dovendo comparir sotto i occhi del giudice,  
 » le sarave stade riconosciude: in adesso el mercante mette le so  
 » merci a quel prezzo, ch' el vol; el suddito ze costretto servirsene  
 » d'estere maniffature, no se esita le nazionali, el mercante no ghe